

Årsmelding 2025

Meir himmel på jorda
Den norske kyrkja er ei vedkjennande,
open, tenande og misjonerande folkekyrkje
som vitnar i ord og gjerning om frelse, fridom og von i Jesus Kristus.

Innhold

Meir himmel på jorda	3
Råd og utval	3
Medlemar og vara i Gulen kyrkjelege råd og fellesråd 2025:	4
Tilsette i Gulen kyrkjelege fellesråd	4
Gudstenester og kyrkjelege seremoniar	5
Trusopplæring	5
Frå 0-13 år	5
Konfirmantarbeidet	5
Sokna	6
Gulen sokneutval v/ Sigrun Haveland	6
Mjømna sokneutval v/ Anne Evjenth Ytreøy	6
Brekke sokneutval v/ Renate Sætre	7
Innsamlingar i sokna	7
Kyrkjelydsarbeidet v/ Håkon Kinsarvik	8
Fellessamlingar og møter gjennom året	9
Kyrkjer og gravplassar	10
Tilsyn i kyrkjene	10
Brekke kyrkje	10
Gulen kyrkje	10
Mjømna kyrkje:	11
Borgstova:	11
Økonomi	12

Meir himmel på jorda

Året som har gått har vore på det jamne, med kyrkjelege handlingar, gudstenester, ulike tilstelningar og arrangement. Med Håkon Kinsarvik som sokneprest og Åse Haugen som trusopplærar har vi fått til eit godt samarbeid både med barnehagane og skulane, med skulegudstenester og besøk i kyrkjene. Kyrkja har ein viktig plass i samfunnet, og samarbeidet med ulike aktørar er godt.

Kyrkja skal forkynne evangeliet til menneske gjennom heile livet, og slik møte menneske i ulike livsfasar. Samtidig skal kyrkja fremje verdiar som utfordrar og byggjer eit godt samfunn for alle.

Med ei uroleg verd, der vi kan tape håpet om fred og forsoning av syne, er det endå viktigare å bygge gode og trygge lokalsamfunn. Vi kan alle bidra på kvar vår måte, og slik vere med å oppfylle visjonen om meir himmel på jorda sjølv i ei uroleg verd.

Kyrkja er der livet vert levd, både no og i framtida.

Ingunn Sognnes, kyrkjeverje

Råd og utval

Det har vore 6 møte i Gulen kyrkjeleg råd / fellesråd, og det er til saman handsama 33 saker. Juni-møtet blei kombinert med sommaravslutning for stab og råd, der prost Helge Taranrød også deltok. I år var vi i Byrknes bedehuskapell, med god servering og samtale om arbeidet.

Det har blitt ein god rutine at nokre av møta blir lagde utanom kommunehuset, slik at dei som sit i rådet blir godt kjende i alle sokna med tilhøyrande kyrkjer og gravplassar. I år har det vore synfaring og møte i Borgstova og i Gulen kyrkje.

Det er oppnemnt eit AU som består av leiar, nestleiar, prest og kyrkjeverje. AU blir i hovudsak brukt til kontakt via mail, med utveksling av synspunkt og orientering om spørsmål som treng ei rask avklaring.

Administrasjonsutvalet har vore sett saman av Bodil Bjørlo Takle, Åse Haugen og tilsettrepr Margrethe Skåden. Det har ikkje vore møte i utvalet i 2025.

Medlemar og vara i Gulen kyrkjelege råd og fellesråd 2025:

Sokn	Medlem	Vara
Brekke	Bodil Bjørlo Takle Jan Helge Kristensen	Johnny Leidvin Langvatn Renate Sætre Line Sætre
Gulen	Åse Haugen Magny Eggum Berg	Odd Harald Eide Halvor Langeseth Brosvik Sigrun Haveland
Mjømna	Anne Kristine Evjenth Ytreøy Mina Cathrin Dahl Andreassen	Sølvi-Ann Oddekav Bente Iren Haugen Erene Oddrun Wilberg
Geistleg repr	Håkon Kinsarvik	Bjørn Magne Hansen
Kommunal repr i GKF	Nils Inge Ynnesdal	Ingolf Wergeland

Av dei faste, folkevalde medlemane i rådet er det 17% menn og 83% kvinner.

Tilsette i Gulen kyrkjelege fellesråd

Tilsette	Stilling	storleik
Ingunn Sognes	Kyrkjeverje	80 %
Margrethe Skåden	Kontorfullmektig	40 %
Peter T. Jobbagy	Organist	60 %
Åse Haugen	Trusopplærar	25 %
Astrid Øie Tveit	Kyrkjetenar Gulen	17%
Randi Trædal	Kyrkjetenar Brekke	14%

Ingolf Wergeland har teke på seg jobben som kyrkjetenar på Mjømna på timebasis, men ynskjer ikkje gå inn i ei fast stilling. Når Ingolf ikkje har hatt høve har det heldigvis løyst seg med frivillege som har teke på seg denne tenesta.

Frå 01.01 har Åse Haugen vore tilsett som trusopplærar.

Maren Daae Eide og Eirik Halsnes har blitt innleigde etter avtale på timebasis med inntil 10% til konfirmantarbeidet. Konfirmantkullet på 10 blei konfirmerte våren 2025, medan nytt kull på 25 konfirmantar starta opp hausten 25.

I staben er det 6 personar med totalt 2,36 årsverk, fordelt på 5 kvinner og 1 mann.

I tillegg kjem soknepreststillinga på 100%, der Håkon Kinsarvik har hatt sitt første heile år i Gulen.

Det har ikkje vore sjukmeldingar utover arbeidsgjevarperioden.

Klokkartenestene i Brekke, Gulen og Mjømna blir utført av frivillige.

Gudstenester og kyrkjelege seremoniar

Sokn	Antal gudstenester totalt	Tal frammøtte	Snitt pr gudsteneste	Antal konfirmerte	Antal døypte	Vielse	Gravferder
Mjømna	18	695	38	2	5	1	4
	19, 21	817, 810	39, 42	4, 3	2, 5	2, 2	8, 9
Gulen	25	1531	61	6	11	1	13
	25, 25	1809, 1357	72, 54	13, 8	7, 13	1, 2	13, 10
Brekke	17	810	47	2	4	0	11
	17, 21	776, 975	45, 46	5, 6	6, 5	3, 0	6, 6

Tal for 2025 øvst, linja under 24 og 23. Tal frammøtte i Gulen sokn i 2024 er høgt på bakgrunn av landslovjubileet.

Trusopplæring

Frå 0-13 år

I år har me hatt ein auke i aktivitetar innan trusopplæring for aldersgruppa 0-13 år.

Me starta året med Kyrkjeklubb ifb med planleggingsdag for skule og barnehage, ein aktivitetsdag med samhald og tilhøyrgheit i fokus.

Det blei både påskevandring og julevandring i dei 3 sokna, med totalt 7 besøk fordelt på kyrkjer, bedehus og barnehagar. Der det var lang reiseveg til kyrkja fekk barnehagen besøk.

Trusopplæringstiltaket Tårnagent vart gjennomført i Mjømna kyrkje, og Lys vaken i Gulen kyrkje. Lys vaken var utan overnatting, men deltakarane var aktiv med i Lys vaken Gudstenesta på søndag.

Det blei arrangert Lørdagsgraut med aktivitetar i Gulen kyrkje, ope for alle med god deltaking.

Hausttakkefest med utdeling av 2-4-6 års bok vart gjennomført i alle tre kyrkjene.

Alle 6 åringar som er registrert i medlemsregisteret i kyrkja, får eitt års abonnement på søndagsskulebladet Barnas tilsendt i posten.

Konfirmantarbeidet

Våren 2025

Det var det 10 konfirmantar fordelt på dei tre sokna: to i Mjømna, seks i Gulen og to i Brekke. Dei var med på fasteaksjonen, konfirmantfestivalen i Knarvik og leir saman med Masfjorden- og Solund- konfirmantane. Konfirmantåret vart avslutta med tre fine konfirmasjonsgudstenester.

Hausten 2025

Konfirmantarbeidet i Gulen har vore prega av eit variert og innhaldsrikt program. Konfirmantane har delteke i gudstenester, undervisning, sosiale samlingar og refleksjonsgrupper. Dette året har vi hatt 25 konfirmantar fordelte slik: éin i Mjømna, ni i Brekke og femten i Gulen sokn.

Leiarane Maren Daae Eide og Eirik Halsnes har vore sentrale i gjennomføringa av opplegget. Deira engasjement, erfaring og innsats har vore avgjerande, og vi set stor pris på arbeidet dei har lagt ned. Soknepresten har vore med i både planlegging og gjennomføring, medan foreldra har bidrege som støttespelarar – anten med mat, vakthald eller transport. Deira innsats har vore til stor hjelp, og vi rettar ei varm takk til dei.

I november var det fellesdag i kyrkja saman med konfirmantar frå Solund og Masfjorden. Det vart ein dag fylt med fellesskap, undervisning og leik. I samarbeid med gravferdsbyråa som oftast deltek ved gravferder i kommunen fekk konfirmantane innsikt i tema som død, gravferd og sorg. Takk til Nordhordland Begravelsesbyrå og Vatne Begravelsesbyrå.

Gjennom eit samarbeid mellom frivilligsentralen, helsesjukepleiarane og kyrkja har ein hatt temakvelder om mellom anna rus, lovverk og grenser. Foreldregruppa vart også invitert til felles samtale om rus og grensesetjing.

På lysmessa første søndag i advent deltok konfirmantane aktivt med lystenning, forbøn, tekstlesing og andre oppgåver. Det vart ei høgtidleg markering der vi vart minna om lyset som er sterkare enn mørket.

Sokna

Gulen sokneutval v/ Sigrun Haveland

Vi har hatt berre to møter i 2025. Vi har delteke på fasteaksjonen saman med konfirmantane, og dugnad på kyrkjegarden. Søndagskulen hadde vi 1 gang pr.mnd i første halvdel av året, men kom ikkje i gang att etter sommarferien av ulike grunnar.

Vi har delteke på presten sin andakt på eldresenteret med kaffi og kaker og har opplevd det veldig positivt. Vi har og delteke på Åse Haugen sine dåps- opplærings- dagar i kyrkja.

Mjømna sokneutval v/ Anne Evjenth Ytreøy

I 2025 hadde Mjømna sokneutvalg 7 møter, derav tre planleggingsmøter i forbindelse med ulike arrangement. Medlemmene i sokneutvalget er, på omgang, kirkeverter der vi ønsker velkommen til kirken, deler ut diverse program og salmebøker ved behov. Vi inviterer til kirkekaffe med hjemmebakst ved alle gudstjenestene. Representanter fra sokneutvalget deltar på månedlige eldretreff på Byrknes Bo- og omsorgsenter sammen med "sulepresten" Bjørn Magne Hansen. På eldretreffene er det andakt, kaffe med hjemmebakst, tid til en koselig pratetund og et populært åresalg. Medlem i sokneutvalget bidrar i ulike oppgaver i forbindelse med den årlige eldreturen i samarbeid med Solund frivilligsentral og sokneprest i Solund, Bjørn Magne Hansen. I april var det tid for dugnad i

og ved kirken. I kirken ble det vasket, støvsuget og ryddet. Gravplassen ble ryddet for bl.a. gjenglemte gravlys og kranser. Kirkebakken, rullestolningangene og trappen ble kostet fri for sand og grus. 8.mai var det fredsgudstjeneste i samarbeid med Bjørn West-gruppen. Det var under gudstjenesten musikalske innslag av ukrainske beboere i kommunen, kransenedleggelse på minnestøtten for oppstart av Bjørn West og på gravminnet etter Konrad Byrknes (en lokal krigshelt). Det ble arrangert en solidaritetskonsert for Ukraina 15. oktober. Denne også i samarbeid med Bjørn West-gruppen. Det var musikalske innslag av lokale ukrainere og deltagere fra Gulen, Solund og Masfjorden. Biletinntektene gikk til hjelpearbeid i Ukraina. Kransenedleggelse på minnestøtten for Bjørn West. Også i 2025 arrangerte sokneutvalget høstfest for beboere i soknet. Dette som en takk for bl.a. dugnadsarbeid og ellers støtte til Mjømna kirke. Som alltid ble det servert koldtbord med et påfølgende kakebord. 14. desember var det julekonsert med Austrheim songlag. Medlemmer av sokneutvalget har ellers deltatt på ulike treff for Yngres, barnehagen m.m. Vi har også deltatt på treff for konfirmantene. Mjømna kirke fyller 125 år i oktober -26. I den forbindelse startet sokneutvalget en "kronerulling" for å kunne gi kirken en jubileumsgave. Ønsket er et piano, evt. flygel i kirken. Dette med tanke på blant annet fremtidige kirkekonsserter.

Brekke sokneutval v/ Renate Sætre

Sokneutvalet har delteke på adventsverkstad. Det har vore eitt møte der kyrkjevevja deltok. I desember blei det gitt blommar til pårørande som hadde mista ein av sine i løpet av året. I år var konfirmantfesten på Brekke bedehus, der sokneutvalet bidrog. I år som tidlegare var det vårdugnad på kyrkjegarden saman med bygdekvinnelaget.



Påskekvelde på Brekke bedehus

Innsamlingar i sokna

Fasteaksjonen der konfirmantane og sokneutvala deltok samla inn ca 16.000 i bøssene, og med det som kom inn på Vipps blei totalen 42.677. Det betyr reint vatn til 142 personar!

Ved ofring i kyrkjene kom det inn kr 27.131 til eige arbeid, og 63.970 overført til andre organisasjonar som blei tildelt offer. Summane inneheld kontantar og vipps, og vipps aukar kvar år.



Skjærtorsdagmåltid Gulen kyrkje

Kyrkjelydsarbeidet v/ Håkon Kinsarvik

No har eg vore sokneprest i Gulen i over eitt år, og når eg ser attende på 2025, kjenner eg på takksemd. Det første året handla mykje om å bli kjend – no handlar det meir om å kome i takt med lokalsamfunnet. Kyrkja i Gulen står støtt, med røter djupt i bygdene og med blikket retta utover.

Dette året har diakonien fått ein endå tydelegare plass. Gjennom haust, vinter og vår har vi vore på bu- og omsorgssentra om lag ein gong i månaden, med andakt, song, bøn og samtale. Besøka har vorte faste møtepunkt – rom for nærvær og verdigheit. Eg vil rette ei stor takk til dei som steller i stand med både kaker, kaffi og åresal. Soknepresten i Solund, Bjørn Magne Hansen, har vore fast med på andakt på eldretunet på Byrknes, medan underteikna har vore på Dalsøyra, Brekke og Eivindvik bu- og omsorgssenter, i tillegg til sjukeheimen.

Konfirmantarbeidet tek mykje tid, men det er ei glede. Vi har styrka undervisninga med meir systematisk opplegg og større rom for refleksjon og samtale. Samarbeidet med kommune og skule er godt, og konfirmantane møter kyrkja både i undervisning, gudstenester og i diakonalt arbeid, mellom anna gjennom besøk på bu- og omsorgssentra og gjennom fasteaksjonen. Det er fint å sjå korleis dei veks med ansvar.

Oppslutnaden om gudstenestene er jamn og god i alle tre sokna. Folk kjem, – til vanlege søndagar, og til høgtider. Mange søker dåp, og det er rørende å få bera born til døypefonten i kyrkjene våre. Ein ser fleire ynskjer å ha dåp også dei sundagen det ikkje er sett opp ordinær gudsteneste.

Samarbeidet med kommunen held fram på ein god måte, ikkje minst gjennom skule- og barnehagegudstenester. Kyrkja har framleis ein naturleg plass i lokalsamfunnet. Det merkar eg òg i møte med sorg og gravferd. Når livet raknar, søker mange til kyrkja. Der finst det språk for både smerte og håp.

I alle sokna ser eg eit levande engasjement. Frivillige stiller opp, sokneutvala vil noko, og det er vilje til å ta ansvar. Born og unge er framleis eit viktig satsingsområde, og det gleder meg å sjå at laurdagsgraut, kyrkjeklubb og mykje anna samlar dei unge.



Laurdagsgraut i Gulen kyrkje

Fellessamlingar og møter gjennom året

Kyrkjeverja har delteke på kyrkjebyggkonferanse og kurs om kyrkjebevaringsfondet i Bergen

Kyrkjeverja er medlem av nøkkelstadgruppa i høve kystpilegrimsleia, og har delteke på møter lokalt og fellesmøte mellom Gulen og Hyllestad

Kyrkjeverja og soknepresten har delteke på møter om prestetenesta i samarbeidsområdet Masfjorden, Gulen og Solund

Kyrkjeverjelaget i NH prosti har møter fysisk eller på teams gjennom året for å drøfte aktuelle saker. Prosten deltek som regel på desse samlingane.

Fysisk møte i kyrkjeverjelaget på Austrheim i mars med orientering om planlegging av namna minnelund og synfaring på gravplassen

SOL-samling (= Sammen om å lede) på Fjon for kyrkjeverjer og prestar med biskop og administrasjon

LIM-samling (= Likestilling, inkludering og mangfald) for Nordhordland prosti på Frekhaug der fleire frå staben deltok

Soknepresten har delteke på kriseteam-skule

Soknepresten har delteke på samarbeidsmøter med kommunen i høve krise-teamet

Soknepresten og kyrkjeverja har hatt møter med tilsette og frivillege i Brekke og Mjømna kyrkje. Møtet som skulle vere i Gulen kyrkje vart utsett til over nyåret.

Kyrkjeverja og leiar i fellesrådet har hatt møte med ordførar og kommuneadministrasjonen i samband med budsjettarbeidet og økonomiplanen.

Utsendingar frå sokna møtte på årsmøtet for Fjon Fjellkyrkje.

Fellesrådsleiar og nestleiar har møtt på samlingar i Bjørgvin for fellesråd/sokneråd.

Kyrkjer og gravplassar

Tilsyn i kyrkjene

Det blei utført brannvern-tilsyn i alle kyrkjene ved brannverninspektør Gjert Holtan ved NHL brann-og redning. Det blei ingen pålegg, men nokre merknader. I hovudsak gjaldt det oppslag i våpenhusa med rømningsplan og skisse over bygningen, berekna antal personar i høve rømningsvegar og instruks. I etterkant heldt han kurs for tilsette og frivillege, det blei gjennomført i mars. Vi gjennomførte også opplæring i førstehjelp v/ Margrethe Skåden.

Kyrkjene har brannvarslings-system som går rett til 110-sentralen. Brannalarmen blei utløyst ved ei gudsteneste i Gulen kyrkje, lokalt brannvesen kom raskt til. Det er årleg kontroll både av sløkkjeutstyret og av brannvarslingsystemet. Vi har også avtale med eit firma om 3-årig EL-tilsyn, med eigenkontroll dei to andre åra. Merknadane som kjem fram ved tilsyn har blitt følgde opp.

Brekke kyrkje

Det er utført ein del arbeid med det elektriske anlegget for å skifte ut gamle ledningar, og setje inn fleire stikkontaktar framme i koret for å unngå bruk av skøyteledningar. Dette som ei oppfølging etter merknadane ved brannvern-inspeksjonen som blei utført i februar. På slutten av året var det synfaring i kyrkja for å kartlegge ny lyssetjing inne i kyrkja, noko som inneber nye lyskuplar, lyssetjing i koret og elles gjennomgang av alle lyskjeldene.

Gulen kyrkje

Det har til tider kome opp spørsmål og diskusjon om kva døypefont som skal brukast i kyrkja, døypefonten i tre frå 1879 eller den gamle vievannsteinen. Etter søknad frå Gulen kyrkjelege råd stadfesta biskop Ragnhild Jepsen i vedtak at døypefonten av tre er den som skal nyttast, og at den skal stå framme i koret. Steinen som har blitt brukt som underlag for dåpsfatet tidlegare kan unntaksvis brukast.

Oppussinga av prestesakristiet har teke tid, men er no gjennomført med godt resultat.

Inne i kyrkjerommet er elevarbeida frå 2016 tekne ned, dei er overlevert til Oppdalsøyra skulemuseum.

I juli fekk vi besøk av 140 pilegrimar som heldt pilegrimsgudsteneste i kyrkja. Dei kom til Sollibotn med skuleskipet Gann, og var på kystpilegrimsferd frå Stavanger til Trondheim med Nidarosdomen og Stiklestad som mål. Tor Singsaas, tidlegare biskop i Nidaros, leia gudstenesta, og det var song ved Den Nasjonale Pilegrimskvartetten.



PRESTESAKRISTIET I GULEN KYRKJE

Mjømna kyrkje:

Hovuddøra til kyrkja er skifta ut, og ny dør kom på plass i sommar. Den er så god kopi av den gamle at det ikkje er lett å sjå at den er skifta, men no er det ingen sprekk eller gliper som slepp vinden inn. Høgtalaranlegget hadde også sett sine beste dagar, det kom ein del klager på at lyden var dårleg. Nytt anlegg blei montert i haust, så no skal alle kunne høyre godt.



NY DØR MJØMNA KYRKJE

Borgstova:

Opningstida i juli har vore samanfallande med opningstida til kyrkja, kl10-18, med utvida opningstid ved førespurnad. Det er tenkt at Borgstova skal vere ein del av tilbodet for kystpilegrimar, og i samband med 20-årsmarkeringa for tusenårsstaden Gulatinget var det pilegrimsvandring og opa stove. Borgstova vert også brukt i samband med konfirmantarrangement i kyrkja, og kan også nyttast av andre.

Gravplassane

Det har blitt sett i gang eit omfattande arbeid for å finne pårørande til graver der vi ikkje har kontaktinformasjon til festar/pårørande. Dette for å gje pårørande høve til å feste grava dersom dei ynskjer det, eller melde frå om at grava skal slettast. I nokre høve finn vi ikkje ut av det, og gravminna vil bli fjerna. Når vi fjernar gravminnet og slettar grava blir den

frigitt til ny bruk, og difor er denne ryddejobben viktig for god drift på gravplassane. I 2025 blei 38 graver sletta, 17 på Oppedal, 11 på Mjømna og resten fordelt på dei andre gravplassane. Dette er graver der fredingstida er ute, og ein del av dei er svært gamle.

Økonomi

Det vert ført felles rekneskap for Gulen kyrkjelege råd og fellesrådet. Ofringar og gåver gitt i dei ulike kyrkjesokna blir ført under tenesta anna kyrkjeleg verksemd, og det kjem fram kor mykje som er samla inn, kor mykje som går til eige arbeid eller som blir vidaresendt til organisasjonane som er tildelt kyrkjeoffera.

Rekneskapen for Gulen kyrkjelege fellesråd er ført på rekneskapsavdelinga i kommunen gjennom tenestekjøpsavtalen. Det er gitt driftstilskot frå kommunen på kr 3.239.335, og investeringstilskot på kr 300.000.

I tillegg kjem verdien av tenesteytingsavtalen på kr 541.000,-, men den har ikkje resultatmessig effekt.

Samarbeidet med kommunen har vore godt, takk til alle som har bidrege til det!

Kyrkjelydsbladet har kome ut med fire nr, og det blei som tidlegare lagt inn giro i haustutgåva. Gåveinngangen har vore god, og det kom inn kr 66.930. Mesteparten av arbeidet blir pr i dag gjort på dugnad, både med oppsett av bladet og med fordeling rundt i postkassane. Overskotet på kr 15.594 vert sett av på fond til bladet. Driftsrekneskapen er oppgjort i balanse.

Det var budsjettert med bruk av 300.000,- frå disposisjonsfondet, medan behovet blei på 25.330. Grunnen er i hovudsak bruk av premiefond i KLP på 157.281 og renteinntekter på 103.744.

Planlagd aktivitet er gjennomført, både når det gjeld vedlikehald av bygg og anlegg, og når det gjeld kyrkjeleg aktivitet.

Investeringsrekneskapen er oppgjort med eit mindreforbruk på kr 142.948.

Det er utført restaurering av vindauga på sørsida av Gulen kyrkje, medan nordsida er utsett til 2026. I Brekke er prosjektet med ny lyssetjing starta opp og planlagt, gjennomføringa kjem i 2026.

Mindreforbruket vil bli overført til investeringsfondet.

Eivindvik 03.03.2026

Bodil Bjørlo Takle

Leiar GKR / GKF

Ingunn Sognnes

Kyrkjeverje